

Transkription von Urkunde HST 1304a

Ort, Datierung: Stralsund, 1304-05-06

Signatur: Stadtarchiv Hansestadt Stralsund, StU 0090 [\[online\]](#)

Inhalt: Wizlau van Ruyen: Friedensbündnis

Wye wizslau vnde zambur von der gnade ghodes vorsten van ruyen bekennet vnde tughet an dessen ieghenwardeghen breue . dat wye alle de schelinge vnde twidracht . de twischen vns beyden heft / gehewesen . dat wye de al hebben geheiket unde ghesunet . also . dat alle de vordachtnisse . up unse man . up unse stede . vnde up abbet arnolde van deme nyen campe . ganz af hebben ghelaten . vnde / eyen ganz vruntscop vnde sune twischen vns . vnde man vnde stede scal syn . Voert mer were dat also . dat ghot uorlate uns . dat ienich schelinge schude twischen vns . der schelinge scholen weldich syn vnse / man vnde vnse stede . also . So wellic vnser vnrecht hedde . den scholen manen vnse man . vnde vnse stede . dat he rechte du . So wellic erer das nicht en dede . so scholen vnse man . vnde vnse stede . bi deme des / dat recht is bliuen . also lange . wante he weder doyt dat unrecht . mit vnser manne vnde stede rade . Were ouer dat also . dat vnser man . oder vnser stede ienich tieghen vns were oder vns vnrecht dede . so / scholen vnse anderen man . vnde vnse andere stede . bi uns bliuen . also lange . wente se vns dat wedder du . Voert mer were dat also . dat vnser eyen oder wye beyde . unsen mannen oder / vnser steden . ienich unrecht deden . so scholen vnse man . vnde vnse stede . thu samene bliuen . tieghen vns . also lange . wente wye se bi rechte laten . vnde dat unrecht weder du . Oec wille wye twe bru/dere wizslau vnde zambur . dat vnser eyen deme anderen helpen schal . up alle de leuet . de uns vnrecht du willen . den schole wye wedder staen . mallic mit deme anderen mit al vnser macht . thu al/len sinen rechten saken . Voert mer so wille wye dat witlic si . dat unse man . vnse stede vnde unse slote vnser negheen . deme anderen . schal untferen oder unteruen . vnde dat unse samende / hand ewichliken een bliuen schal . vnde vnghe scheden . Dat desse ding unghebroken vnde stede bliuen . so hebbe wye daer up ghelouet vnser mannen . vnde vnser steden untruwen . vnde se hebbet / vns weder ghe louet . De riddere sint desse: iohan van gristow . hinrick van dechowe . conrad dotenberch hinric van den woelde . werner van tribbeses . hinric vnde iohan vnde conrad de brudere van den / bughe . chotan mordere . thideric bere . mathias van der boeken . boekeman de iunge . arnold van viten . gherlach van smachteshaghen . frederic van alkuen . arnold wokenstede . ernest budde . ioachim . vit/co molteke . Unde de raetman van deme stralessunde dat sint desse . conrad heren rederes sone . thideric . van dorpen . albert kureland . bernard van scaprode . gherwin van semelowe . iohan van stradeborch / albert sachteleuent . iohan woltdorp . herman witte . iohan van meppen . arnold van reuele . bertram traudemunde . seghefrid . ghodeke heren yben . iohan cranz . witte bertold . wicbern . Dat desse / ding vast vnde stede bliuen so hebbe wye sterket desse scrift mit vnser ingheseghelen . vnde unser man . de hir ghescreuen sint . her pritbur van der uilmenitz . lodewich kabolt . rauwen buk / gherlach van smachteshaghen . ernest budde . arnold van viten . arnold wokenstede . thideric mezece . ioachim . victo van alkuen . iohan van gristowe . claus vn(de) teztse Van pudbus/ke . hinric van der osten de marscalk . hinric van dechowe . werner van triubbeses conrad dotenberch . thideric bere . arnold van der osten . chotan mordere . Vnde mit den ingheseghelen / vnser stede . van deme stralessunde . van trubbeses . van grimme . van baert . vnde van loztse . Dit is gheschen in der stat thu deme stralessunde na vnser heren godes bort dusent iaer / dre hondert iaer in deme veerden iare in sunte iohannes daghe ante portam latinam

